

Hunto cu representante di 20 pais cu ta biba na Aruba ta trahando riba un show multi-cultural inolvidabel

E preparacionnan pa e 'III Encuentro Multi-Cultural 2008', riba Plaza G.F. Betico Croes, ta den full swing. Esaki lo tuma luga awe dia 1 di november, cu representante procedente di 20 pais, cu ta biba na Aruba. Departamento di Cultura, hunto cu e gruponan di e colonianan participante ta preparando un programa pa ofrece Aruba un show maraviyoso y inolvidabel. Apertura di e programa ta na encargo di e futuro docente di baile, Fatme Rigaud, cu participacion di diferente scol secundario y invitado special di diferente comunidad biba na Aruba. E presentacion aki ta interpreta e tema "Man den Man", tema musical di Olimpiada di Korea (Seul) 1988, cu traduccion y letra di Maybelline Arends-Croes.

E evento multi-cultural aki a crece enormemente desde cu Ministerio di Labor, Cultura y Deporte a inicia cu e evento aki. Na aña 2006 a participa en total 12 pais y den aña 2007 tabatin

un total di 14 pais cu a inscribi y na final 12 pais a participa. E aña aki un total di 23 pais a inscribi. Di esakinan tin tres pais cu a cancela y awo tin 20 pais cu ta preparando pa awe presenta nan cultura na pueblo di Aruba. E paisnan cu lo participa den e di 'III Encuentro Multi-Cultural' segun secuencia di e programa di e show ta: Israel, Republica Dominicana, Libano, Portugal, Argentina, China, Mexico, Filipina, Colombia, Corsow, Brazil, Trinidad y Tobago, Peru, Venezuela y Aruba lo finalisa e Show. Den e Feria di artesanía y cuminda tin tambe e paisnan Costa Rica, Bonaire, Haiti, Surinam y India.

Di parti di Minister di Labor, Cultura y Deporte, conhuntamente cu Departamento di Cultura, nos ta gradici tur esnan, cu di un of otro forma, a haci di e espectáculo aki un evento cu ta refleha e cultura y e union di hende di diferente pais, cu ta biba na Aruba.



E programa nacional aki no por a keda realisa sin e aporte, sosten y entusiasmo di e consulnan, e studiantenan di IPA di Seccion Movecion y Salud, director y grupo artistico representando cada pais, diferente fundacion, medionan di comunicacion y un grupo di voluntario cu tin hopi amor pa e desaroyo multi-cultural na Aruba.

Na nomber di e empleadonan di Departamento di Cultura Aruba, no ta keda nada otro cu yama danki y invita pueblo di Aruba pa bin convivi e anochi aki, awe dia 1 di november 2008, cuminsando for di 5'or di atardi te cu 11'or di anochi. Un espectáculo completamente gratis, celebrando Aña di Cultura. E clausura di e programa lo ta

na encargo di SHARON ROSE kende lo deleita e pueblo di Aruba cu su cancion dedica na Aña di Cultura. Eye Band, bao direccion di Danny Koolman lo acompaña Sharon. Pa Aruba lo tin presentacion tambe di Club di Movimento bao direccion di Samanta Westera-Juppa y Aruba Dancing Beez bou direccion di Sheila Lazo-Tromp.